

Ministro Lee a informa:

Gobierno lo ehecuta proyecto di museo di distribucion di awa

ORANJESTAD (AAN) -- Un bunita emision di tres stampia dedica na WEB Aruba N.V su 70 aniversario di desalinacion, a worde presenta ayera mainta den conferencia di prensa, convoca pa Ministro Ramon Lee, titular di Labor, Cultura y Deporte, den cual el a anuncia tambe cu gobierno

lo ehecuta proyecto di museo di distribucion di awa.

Tabata presente tambe director di Servicio Postal, señor Franklin Croes; Ing. Jossy Lacle, director di WEB Aruba N.V hunto cu e Relacionista Publico señor Kelvin Augustin y señor Michel van der Linde; y señora Vivian Alberto, Hefe di Servicio Filatelico di Postkantoor. Ministro Ramon Lee, prome cu referi na e emision di stampianan aki, a probecha pa gradicé prensa en general pa su aporte valioso na su Ministerio y specialmente na e Olimpiada Escolar cu ta hayando hopi cobertura.

Despues e ministro a sigui riba e tema di conmemora-



cion di e 70 añanan di desalinacion di awa di lama, y distribucion di awa potable y coriente door di nos planta productor WEB Aruba N.V. Pa conmemora esaki Servicio Postal a emiti un serie di tres stampianan, algo cu ta na su lugar y bon mereci pasobra

setenta aña di trabao continuo no ta facil, pero e ta rekeri di hopi madurez y forza pa asina yega unda cu WEB Aruba N.V ta awendia.

Ministro Ramon Lee a duna di conoce cu su ministerio lo bin cu un museo relaciona cu distribucion di awa na Aruba,

con el a cuminsa y con el a sigui te aworaki despues di setenta aña.

Pa ehecuta e proyecto aki falta ainda pa e dos "watertoren" worde traspasa pa e Fondo di Monumento, y e ora ey lo traha sigur riba e ehecucion di e plan.